

La regenza federala nova da la Germania

Midadas politicas internas ed europeicas

DA GUIU SOBIELA-CAANITZ

■ Il 14 da mars ha il parlament federal da la Germania reelegi Angela Merkel (*1954 a Hamburg), scheffa da l'Uniuon cristiandemocrata (cdu), chanceliera federala cun 364 vuschs cunter 315. Sia maioritad parlamentara sa basa sin la cdu, la Partida socialdemocrata (spd) e l'Uniuon cristiansociala (csu). Il vice-chancelier nov è Olaf Scholz (spd; *1958 ad Osnabrück en Saxonia bassa); nov è er il fatg ch'el vegn minister da las finanzas. Er il titular nov da l'exteriur è da la spd: Heiko Maas (*1966 a Saarlouis en Saarland); el deriva pia d'in «Bundesland» al cunfin sidvest nua ch'ins instruescha franzos sco emprima lingua estra. Bliers umans vegnan mintga di da la Lorena limitrofa a lavurar en il pitschen Saarland (strusch in milliun olmas). «Landesmutter» era Annegret Kramp-Karrenbauer («AKK»; *1962 a Völklingen en Saarland); dapi favrer è ella secretaria generala da la cdu. Merkel metta pais sin las relaziuns cun ses collega franzos Emmanuel Macron (*1977). Lez sto però deditgar l'onn 2018 ad inslas franzosas: Paris elavura in statut d'autonomia cun represchents da la Corsica (330 354 olmas) ed arranscha per il november in referendum davart l'indipendenza da la Nova Caledonia (var 273 000 olmas) en il Pacific.

Integrar ils «Bundesländer» novs
Minister federal Maas ha declerà areguard la Russia: «Anc adina na lain nus acceptar ni l'annexiuon da la Crimea en violaziun dal dretg internaziunal ni la constanta agressiuon cunter l'Ucraina» (1). La Germania sto dentant schliar dus grevs problems d'integraziun. Da 1949 a 1990 ha la part da Germania occupada da l'URSS furmà la «DDR». 1989 è il mir da Berlin crudà; milliuns umans èn fugids da la «DDR» vers la Republica federala. Il 22 da zercladur 1990 ha la «DDR» federalisà ses intschess cun il «Ländereinführungsgesetz» (2). Ils 31 d'avust ha ella firmà il patg d'uniun cun la Republica federala, entrà en vigur ils 3 d'october. L'integraziun sociala dals sis «Bundesländer» novs n'è però betg ida uschè svelta. Lezzas sa distinguan dals



Angela Merkel.

MAD

diesch pajais fundatur cun il fatg che las baselgias evangelicas tradiziunalas e la catolica represchentan ensemen mo ina minoritad da la populaziun, sin il pli pauc 16,2% en Saxonia-Anhalt (passa 2,2 milliuns olmas). Era las partidas tradiziunalas da la Germania federala han dapli fadia per s'affirmar en l'anteriura «DDR». En Saxonia (passa quatter milliuns olmas) per exempel è il primminister cdu sa retratg 2017 suenter elecziuns ch'avevan dà pli paucas vuschs a sia partida ch'a la dretga extrema xenofoba («Alternative für Deutschland», afd). Lezza carmala vuschs (94 mandats en l'actual «Bundestag») oravant tut pervi da las temas areguard l'immigraziun dals davos onns.

La ministra da las famiglias

La chanceliera federala è creschida si en la «DDR» sco figlia d'in preditgant. Ses district electoral è situà en Pomarania. Ella è tant pli sensibla al pauc success da la cdu e da las baselgias en ils sis stadis novs. Cun furmar la regenza ha la spd chattà la politologa Franziska Giffrey (*1962 a Frankfurt [Oder] en Brandenburg); lezza presidiava Neukölln, l'otgavel district da Berlin: 328 045 olmas, 24,4% estras, pia 81 382, da las qualas 33 944 da pajais islamics. Giffrey è ussa ministra federala da las famiglias. La NZZ dals 10 da mars scriva: «Giffrey na vul betg tolerar che muslims na dettian ad ella il maun perquai ch'ella è ina fem-

na. Ella smaladescha lètg arranschadas e na vul acceptar ch'ins tegnia mattas davent da l'instrucziun da nataziun pervi da la religiuon (...). 2010 è ella vegnida cussegliera da citad per la scola. Ella ha chattà ora la via per gidar uffants da famiglias pauc cultivadas, cun scolars per l'entir di empè da suentermezdis lungurus cun parentellas problematicas (...). Ella ha installà in procuratur public a Neukölln per cumbatter cun success tgi che violescha la lescha. Ella na tolerescha gnanca delicts minimis. Ella ha engaschà ina polizia da segirezza per cumbatter l'allontanament illegal dal rument (...). Sco mamma ed anteriura cussegliera da citad per la scola enconuscha ella bain ils problems» (p. 5). Tar la nominaziun festiva da la regenza ha president federal Franz-Walter Steinmeier (*1956, Detmold en Vestfalia, spd) fatg endament «dumondas da giustia, la politica da fugitivs e la migraziun, l'integraziun e la patria ['Heimat']» (cità da la Frankfurter Allgemeine Zeitung, 15 da mars, p. 1). Cuntrast: Il parlament catalan da sia vart na po gnanca furmar ina regenza damai che Madrid prolunga dapi mais l'«arrest d'inquisiziun» da pliras personalitads politicas.

1. Cità en: Frankfurter Allgemeine Zeitung, 15 da mars 2016, p. 3.

2. Ils stadis commembers novs da la Germania han num: Berlin, Brandenburg, Mecklenburg-Pomarania dal vest, Saxonia (stadi liber), Saxonia-Anhalt, Turinga (stadi liber).